

OSLOBOĐENJE
2.1.2008.

Predsjednik Općinskog suda
Sarajevo Goran Salihović

Sud guše neplaćene komunalije

Uskoro formiranje posebnog odjeljenja za
brakorazvodne parnice • Profesionalnost
umjesto poslušnosti

U Općinskom sudu Sarajevo uskoro će biti formirano porodično odjeljenje, koje će rješavati porodične sporove - brakorazvodne parnice i podjelu zajednički stečene imovine supružnika, kako je to definirano novim porodičnim zakonom.

Predsjednik Općinskog suda Sarajevo Goran Salihović kazao je Feni da očekuje da će novo odjeljenje početi raditi u martu iduće godine. U njemu će raditi šest ili sedam sudija koji su dosad radili u Parničnom odjeljenju.

Salihović napominje da će na taj način biti rasterećen rad Parničnog odjeljenja. Sumirajući rezultate u 2007. godini, predsjednik Općinskog suda naročito uspješnom cijeni reformu prekršajnih sudova, podsjećajući da je to godina u kojoj su počela s radom i dva nova odjeljenja - Parnično odjeljenje za sporove male vrijednosti i Izvršno odjeljenje po vjerodostojnim ispravama.

„Ono što i dalje opterećuje rad ovog suda jesu komunalni predmeti kojih u ovom trenutku ima oko 880.000 ili 86 posto ukupnog broja predmeta, a čime se Općinski sud ubuduće ne bi trebao baviti”, pojasnio je Salihović.

On smatra da izlaz iz ove situacije treba tražiti izmjenom propisa, ustrojem državne agencije za naplatu komunalnih dugova i registra novčanih kazni i potraživanja, odnosno privatizacijom javnih komunalnih preduzeća.



Goran Salihović

Salihović je kazao i da su problem ograničeni kapaciteti zatvora, zbog čega osuđenici ne mogu biti blagovremeno upućeni na izdržavanje kazni.

To je problem, kazao je, koji bi trebale riješiti nadležne institucije u BiH, kako bi omogućile da osuđenici kazne izdržavaju bez ograničenja, u cijeloj zemlji.

Salihović se protivi osnivanju posebnih trgovačkih ili privrednih sudova koji bi preuzeli ulogu privrednog odjeljenja. On ocjenjuje da bi to bio ekonomski neopravdan i neracionalan potez.

Najvišim dometom on smatra osnivanje Visokog sudskog i tužiteljskog vijeća (VSTV) i njegovu ulogu u stvaranju ambijenta za punu neovisnost pravosuđa, te generiranje profesionalizma sudija, umjesto njihove poslušnosti.